

TEKNOLOGIA

Datuetara murriztuak



DIANA FRANCO

Lan produktiboa eta bizitzaren lana gauza bera direla esango nuke. Bizitza on bat izateko, ondo elikatu, gorputza zaindu, babestuta egon, harremanak mantendu... behar dituzu eta hori lan handia da. Enpresen izaera antzekoa da. Bizitzaren lana eta lan produktiboa mendekotasunez beteriko dinamikak dira. Eta bizitzaren mendekotasunak nahikoak ez balira, lan produktiboaren mendekotasunek gure indarra eta denbora xurgatzen doaz. Noraino hel zaitezke tirabira honetan? Noraino xurgatu dezakete enpresek zure indarra? Noraino utzi dezakezu alde batera bizitzaren zaintza lan produktiboaren mesederako? Enpresa askotan lehengaiak gizakion lan indarra da. Lan indar hau batzuetan akzio mekaniko bat izaten da, eta bestetan balio asko sortu dezakeen jarduera, merkatu bat sortzea adibidez. Lan indarraren espresio guztiak beharrezkoak dira enpresek bizirik irauteko.

Historikoki, iraultza industrialetik lan indarra, lan baliabidea, ordutan neurtua izan da. Egun, enpresa askorentzat helburua lanaldi bakoitzaren etekin handiena lortzea da: gure jarduera guztiak datuetara itzuli behar ditugu enpresa askotan, kontratatut egiten gaituzten denbora probetxuz erabili dela neurtu dezaten. Datuak konplexutasuna sinplifikatuko duten ustea da nagusi, datuetan aditzera emaniko jarduerak hobeto ulertu eta errepikatzeke gai izango gara.

Zoritzarrez, berdin gabilta bizitzan, dena objetibizatzen (jan duguna aplikazio batean sartuz, eman ditugun pausoak aplikazio batekin jarraituz, hilerokoa aplikazio batekin kontrolatuz...): lan produktiboaren datifikazioaren logikak bizitzaren lana kutsatu du. Bizitzakiko pertzepzioa galtzen gabilta, gure bizitzen izaera datuetara murrizten gabilta heinean. ●

NAZIOARTEA



Txinako lehen ministro-orde eta sailburu berriak.

Zer ote da "kalitate handiko garapena"?

MIKEL ARAMENDI

Izendapen-zaparrada ikusgarriarekin batera, ekarpen kontzeptual bat ere utzi digu astebetetz Beijingen, sakramentu-eitez, ospatu den 2023ko *lianghui*-ak: "Kalitate handiko garapena".

Egiari zor, ez izendapenak eta ez kontzeptua ez dira biziro berriak. Gokargudun berri nagusiak igarri zitezkeen urrian egindako Alderdiaren XX. Kongresuan eratu zen zuzendaritza aztertuz, protokoloa milimetrikoa baita kasurik gehien-gehienetan. Hala ere, Kongresu ondoko berrikuntza erabatekoa denez estatu-aparatu osoan (Ezekutiboa ez ezik, Legegilea eta Judiziala eta kontrol-aparatu ere buru-berritu egiten dira bat-batean), entretenigarri ugari badute gure inguruko sinologoek datozen asteetarako. Batzuek gogotik ekin diote jada, datu gutxi eta sukar propagandistiko soberarekin. Deliberamendua, betiere, aurretik dela: kargudun berri guztiak Xiren sokakoak omen dira. Duela bost urte ere horixe bera ondorioztatu zuten ia den-denek.

"Kalitate handiko garapenaren" otoizlaburra da, haatik, protagonisten ahotik entzuten dena, hitzetik hortzera. Eta esamoldea ez bada, berritasun gutxi du horrek ere, esaterako, Politburu berrituak jada urtarrilean egin zuen *ikasketa kolektiboan* "garapen-eredu berri" haren aldean. Gogoan izan behar da aginte-gorenaren hilean behingo

ikasketa kolektibo horiek, usu, izaten direla berandu gabe estatu-aparatuak egikarrituko dituen politiken iragarpen argi eta gardenenak. Kasu honetan, etiketa doitu besterik gabe, itxura denez.

Kontzeptuaren sakoneko edukia zein den kausitzea korapilatsuagoa egiten da, ordea. Baina ez haren esanahia gordeta dagoelako, baizik fazeta askotxo barne hartzen dituelako. Oso argi dago barne-merkatua hauspotu eta ekonomiararen ardatz bihurtzea dela delibero nagusia, ahalik atal gehienetan (elika-dura, energia, lehengaiak, teknologia...) autosufizientzia lortzeari lehentasuna emanez, atzerrian AEB lantzen ari diren giroarekin baikor izatea ez dela errealista deliberatuta, ziur. Hala ere, autarkiaren bila abiatzeari uko egiten zaiola ere oso argi dago, nagusiki esportatzaile izaten jarraitzen duen ekonomia batean logika hutsekoa denez.

Ur sakonagoetan murgildu eta "kalitate handiko garapen" horren zirriborroa izan daitekeen dokumentuan murgiltzen denari, agian, berriagoak egingo zaizkio (Txinari buruzko estereotipo mendebaldarrez ase bada behintzat) beste osagai batzuk: garapen horrek jendearen ongizateari eta jasangarritasunari eskaini beharko liokeen garrantzia, lurraldeen eta bizibideen orekaren premia...

Gertuagoan entzunak ditugunak, asko. ●